

Y Pwyllgor Deddfwriaeth, Cyfiawnder a'r Cyfansoddiad Adroddiad monitro

Mai 2022

Cynnwys

1.	Cyflwyniad	2
2.	Cysylltiadau rhwng y DU a'r UE	2
3.	Ymwahanu trefniadau'r DU a'r UE.....	6
4.	Cysylltiadau rhynglywodraethol.....	6
5.	Deddf Marchnad Fewnol y DU	7
6.	Fframweithiau cyffredin	8
7.	Deddfwriaeth	9
8.	Comisiwn y Cyfansoddiad	11
9.	Diwygio'r Senedd.....	12
10.	Cyfiawnder	12



1. Cyflwyniad

Mae gan y Pwyllgor Deddfwriaeth, Cyfiawnder a'r Cyfansoddiad gylch gwaith eang sy'n cwmpasu amrywiaeth o feysydd. Bwriad yr adroddiad monitro hwn yw rhoi'r wybodaeth ddiweddaraf i aelodau'r Pwyllgor am ddatblygiadau polisi allweddol sy'n gysylltiedig â chylch gwaith y Pwyllgor.

Bydd y Pwyllgor yn ystyried y materion hyn ac unrhyw gamau y mae'n dymuno eu cymryd wrth ymateb iddynt. Mae'r adroddiad hwn yn cael ei gyhoeddi er mwyn rhoi gwybod i randdeiliaid am rai o'r materion y mae'r Pwyllgor wrthi'n eu trafod ar hyn o bryd.

Mae geirfa o dermau allweddol wedi'i chynnwys fel atodiad.

2. Cysylltiadau rhwng y DU a'r UE

Mae'r adran hon yn rhoi'r wybodaeth ddiweddaraf am anghydfodau rhwng y DU a'r UE, y cyfarfodydd diweddaraf rhwng y DU a'r UE, gweithredu'r Cytundebau Ymadael a Masnach a Chydweithredu, a datblygiadau eraill, gan gynnwys rhyfel Wcráin a Rwsia.

Mae anghydfodau rhwng y DU a'r UE yn parhau mewn nifer o feysydd:

- **Yn Sefydliad Masnach y Byd:** Fe wnaeth yr UE gychwyn yr anghydfod Sefydliad Masnach y Byd cyntaf rhwng y DU a'r UE ers Brexit dros gymorthdaliadau a thyrbinau gwynt ar 30 Mawrth. Mae'n honni bod y meini prawf y mae'r DU yn eu defnyddio wrth ddyfarnu cymorthdaliadau ar gyfer prosiectau ynni gwynt ar y môr yn ffafrio'r DU yn hytrach na chynnwys wedi'i fewnforio, a waherddir gan reolau Sefydliad Masnach y Byd.
- **Anghydfodau masnach y Cytundeb Masnach a Chydweithredu:** Mae cofnodion cyfarfodydd Pwyllgor Partneriaeth Masnach y Cytundeb Masnach a Chydweithredu yn rhoi manylion y gwahanol safbwyntiau ar nifer o faterion masnach. Y rhai a restrir yw TAW ac adennill dyledion, cynrychiolwyr cyllidol, Cronfa Addasiadau Brexit yr UE, cynlluniau ynni adnewyddadwy y DU, rheolau gweithdrefn ar gyfer Gweithgorau y Cytundeb Masnach a Chydweithredu ac a ddylai materion sy'n cael eu codi gan Bwyllgor Masnach Arbenigol y Cytundeb Masnach a

Chydweithredu gael eu cyfeirio at y Cyngor Partneriaeth. Mae materion o'r fath yn cynnwys tatws hadyd a molysgiaid dwygragennog byw, ac artistiaid teithiol. Mae'r cofnodion hefyd yn dangos bod yr UE wedi gwrthod cais y DU i ddiwygio'r Cytundeb Masnach a Chydweithredu ar TAW ac adennill dyledion.

- **Hawliau dinasyddion:** Mae'r ddwy ochr yn parhau i godi materion yn y Cydbwyllgor ynghylch gweithredu darpariaethau hawliau dinasyddion y Cytundeb Ymadael.
- **Gogledd Iwerddon:** Mae'r ddwy ochr yn parhau i fynd i'r afael â materion parhaus ynghylch Protocol Gogledd Iwerddon a cheisio atebion parhaol cyn gynted â phosibl. Dywedodd y Financial Times fod Llywodraeth y DU yn bwriadu cyflwyno deddfwriaeth ym mis Mai a fyddai'n galluogi Gweinidogion i ddiystyru'r Protocol yn unochrog, gan gynnwys canlyniad y bleidlais cydsyniad democrataidd. Dywedodd Prif Weinidog y DU wrth y BBC ar 23 Mawrth fod deddfwriaeth newydd yn opsiwn.

Cyfarfodydd y DU a'r UE

Mae Gweinidogion Cymru neu eu swyddogion wedi bod yn bresennol yn y rhan fwyaf o gyfarfodydd lle mae'r pwnc mewn maes datganoledig neu faes a gadwyd yn ôl. Mae'r cyfarfodydd diweddaraf wedi ymdrin â physgodfeydd, ynni, cyfranogiad yn rhaglenni'r UE, gorfodi'r gyfraith, trafndiaeth awyr a diogelwch hedfan.

Fodd bynnag, fe wnaethant ddewis peidio â mynd i rai cyfarfodydd yn ymdrin â chyfrifoldebau Llywodraeth Cymru. Dywedodd y Gweinidog Cyllid a Llywodraeth Leol wrth y Senedd ei bod wedi dewis peidio â mynd i'r cyfarfod ar gaffael oherwydd nad oedd unrhyw eitemau ar yr agenda a oedd yn cyfiawnhau ei phresenoldeb. Mae'r agenda a'r cofnodion yn dangos y trafodwyd datblygiadau polisi a deddfwriaethol y DU a'r UE, yn ogystal â materion gweithredu, gan gynnwys cyfnewid ystadegau.

Roedd swyddogion o Lywodraeth yr Alban, Gweithrediaeth Gogledd Iwerddon a Llywodraeth Ynys Manaw yn bresennol mewn rhai cyfarfodydd heb Lywodraeth Cymru ynghylch trafnidiaeth ffordd a TAW, adennill treth a thollau.

Bydd dau Aelod o'r Senedd yn bresennol yng nghyfarfod cyntaf y Cynulliad Partneriaeth Seneddol fel sylwedyddion ym Mrwsel ar 12-13 Mai. Mae disgwyl i gynrychiolwyr drafod gweithrediad y Cytundeb Masnach a Chydweithredu a goblygiadau'r rhyfel yn Wcráin.

Cyhoeddwyd aelodaeth Grŵp Cyngori Domestig y DU ar 31 Mawrth.

Cynrychiolir Cymru gan nifer o sefydliadau y DU gyfan a Chyngor Gweithredu Gwirfoddol Cymru.

Mae perthynas rhwng y DU a Phwyllgor y Rhanbarthau yn parhau i gryfhau.

Cynhaliodd y Senedd gyfarfod wyneb yn wyneb cyntaf Grŵp Cyswllt y DU a Phwyllgor y Rhanbarthau ar 17-18 Mawrth 2022. Daeth cynrychiolwyr o bob rhan o'r DU a'r UE. Cynhaliodd y cynrychiolwyr drafodaethau gyda Phrif Weinidog Cymru, Dirprwy Lywydd y Senedd, dirprwyaeth yr UE i'r DU, Natalie Loiseau ASE a Syr Oliver Heald AS. Cynrychiolwyd y Senedd gan Alun Davies AS a Laura Anne Jones AS.

Mabwysiadodd Pwyllgor y Rhanbarthau farn o blaid cryfhau'r berthynas rhwng y DU a'r UE ym mis Ebrill. Cafodd y farn, a ddrafftwyd gan y Cyngorydd Michael Murphy, ei chymeradwyo mewn sesiwn lawn ar 27 Ebrill. Mae'n galw ar y DU a'r UE i gydnabod grŵp cyswllt y DU a Phwyllgor y Rhanbarthau fel cydgysylltydd ffurfiol o dan y Cytundeb Masnach a Chydweithredu, ac mae'n tynnu sylw at feysydd nas manteisiwyd arnynt ar gyfer cydweithredu pellach rhwng rhanbarthau'r DU a'r UE ar ôl Brexit. Roedd y Comisiynydd Sěčovič yn y sesiwn lawn a chroesawodd uchelgais Pwyllgor y Rhanbarthau i gryfhau cysylltiadau yr UE a'r DU ar lefel ranbarthol a lleol.

Gweithredu cytundebau'r DU a'r UE

Cafodd rheolaethau mewnfario ar symud nwyddau o'r UE/Gogledd Iwerddon i Brydain Fawr eu gohirio am y pedwerydd tro ar 28 Ebrill gan Lywodraeth y DU, a hynny tan ddiwedd 2023. Dywedodd Jacob Rees-Mogg, y Gweinidog Cyfleoedd Brexit, y bydd y penderfyniad yn caniatáu i fusnesau Prydeinig ganolbwyntio ar eu hadferiad o'r pandemig, ymdopi â materion cadwyn gyflenwi byd-eang a sicrhau nad yw costau newydd yn cael eu trosglwyddo i ddefnyddwyr.

Mae Vaughan Gething, Gweinidog yr Economi, yn dweud bod hyn "yn codi nifer o gwestiynau" am fiaddiogelwch ac allforwyr y mae swyddogion yn "mynd ar eu trywydd ar fyrder", ac addawodd i roi'r diweddaraf am hyn cyn gynted â phosibl.

Dywedodd y Gweinidog y bydd Safle Rheoli Ffin cyntaf yng Nghymru yn weithredol yng Nghaergybi ym mis Ebrill 2023. Nid oes gan y safleoedd eraill sydd wedi'u cynllunio i wasanaethu Abergwaun a Doc Penfro, ddyddiadau cwblhau disgwylidig.

Cytunodd Cyngor yr UE ar gamau i gadw'r cyflenwad di-dor o feddyginiaethau at ddefnydd pobl i Ogledd Iwerddon, sef un o ofynion Protocol Gogledd Iwerddon. Mae'r [Cyfarwydddeb](#) hefyd yn caniatáu i'r DU roi ei meddyginiaethau ar y farchnad yn Iwerddon, Malta a Chyprus am dair blynedd, gan randdirymu gofyniad yr UE i ddeiliaid awdurdodiadau fod wedi'u sefydlu yn yr UE.

Cyhoeddodd yr UE [gynigion](#) ar gyfer gweithredu a gorfodi cytundebau presennol y DU a'r UE a rhai yn y dyfodol. Maent yn nodi prosesau mewnol yr UE ar gyfer gwahanol elfennau o bob cytundeb cyfredol. Er enghraifft, mae'r cynigion yn rhoi'r hawl i Aelod-wladwriaethau ofyn am gychwyn proses adolygu y Cytundeb Masnach a Chydweithredu TCA pan fydd mesurau ail-gydbwysu sy'n ymwneud â chwarae teg wedi bod ar waith ers blwyddyn neu fwy. Maent hefyd yn darparu bod yn rhaid i'r Comisiwn Ewropeaidd baratoi adroddiad ar eu cais o fewn pum mlynedd ar gyfer Pwyllgor y Rhanbarthau ac eraill.

Trafododd yr Uchel Lys ei achos cyntaf yn ymwneud â rheolau cymhorthdal rhwng y DU a'r UE, yn benodol Erthygl 10 o Brotocol Gogledd Iwerddon ac egwyddorion rheoli cymorthdaliadau'r Cytundeb Masnach a Chydweithredu, sy'n rhan o drefn ôl-Brexit y DU. Roedd [yr achos](#) yn ymwneud â British Sugar, a fethodd â pherswadio'r llys bod amodau wedi'u torri er budd Tate & Lyle. Mae rhagor o wybodaeth ar gael gan [George Peretz QC](#) yn EU Relations Law.

Datblygiadau eraill

Aelodau o'r UE i Wcráin

Cymerodd yr UE y camau cyntaf ar gyfer [aelodaeth o'r UE i Wcráin](#) mewn cynhadledd i'r wasg ar y cyd rhwng yr UE ac Wcráin ar 8 Ebrill. Cyflwynodd yr Arlywydd Zelensky holiadur Wcráin ar 18 Ebrill ac mae'n disgwyl [penderfyniad ym mis Mehefin](#). Mae'r rhyfel hefyd wedi ysgogi [Moldofa a Georgia](#) i wneud cais am aelodaeth llwybr carlam.

Mae Erthygl 781 o'r Cytundeb Masnach a Chydweithredu yn darparu rôl i'r DU pan fydd gwledydd newydd yn gwneud cais am aelodaeth o'r UE. Rhaid i'r UE hysbysu'r DU am geisiadau i ymuno â'r UE, darparu gwybodaeth i'r DU am sut y byddai derbyn cais yn effeithio ar gytundebau'r DU a'r UE, ac ystyried pryderon y DU. Mae Llywodraeth Cymru yn mynychu cyfarfodydd y [Cyngor Partneriaeth](#), sy'n goruchwylio'r Cytundeb Masnach a Chydweithredu, ac sydd â phwerau yn y maes hwn.

Mae [erthygl ddiweddaraf](#) Ymchwil y Senedd yn rhoi crynodeb o effaith y rhyfel ar Gymru.

Tarfu ar longau ym Môr Iwerddon

Cafwyd [tarfu ar fferïau ym Môr Iwerddon ym mis Ebrill](#), gan achosi ofnau am gyflenwadau yng Ngogledd Iwerddon. Fe wnaeth Stena Line atal llongau rhwng Abergwaun, Sir Benfro a Rosslare dros dro er mwyn llenwi bylchau a adawyd gan P&O, a ataliodd ei wasanaethau ar ôl diswyddo 800 o staff heb rybudd ym mis Mawrth. Roedd [cludwyr yng Ngogledd Iwerddon](#) yn rhedeg ar gapasiti o 50 y cant.

Disodli cyllid yr UE

Ar 13 Ebrill, cyhoeddodd Llywodraeth y DU [fanylion newydd](#) am y [Gronfa Ffyniant Cyffredin](#) ar ôl Brexit, y mae [Llywodraeth Cymru yn honni](#) fydd yn gadael Cymru yn wynebu “colled o dros £1bn mewn cyllid heb ei ddisodli dros y tair blynedd nesaf”. Mae'r Prif Weinidog [wedi cyhuddo](#) Llywodraeth y DU o dorri ei hymrwymiad blaenorol na fyddai Cymru “geiniog ar ei cholled” ar ôl Brexit. Dangosodd Llywodraeth Cymru ei chyfrifiadau ar 4 Mai, a oedd yn dangos [diffyg o £772m](#). Mae'r [Pwyllgor Cyllid](#) yn y camau cynnar o ystyried goblygiadau cyllid ar ôl Brexit.

3. Ymwahanu trefniadau'r DU a'r UE

Cyhoeddodd Llywodraeth y DU adroddiad [‘The benefits of Brexit: how the UK is taking advantage of leaving the EU’](#) ar 31 Ionawr 2022. Mae'r adroddiad yn cynnwys adrannau ar reoliadau, gwyddoniaeth, data a thechnoleg, busnes a diwydiant, seilwaith a ffyniant bro, hinsawdd, yr amgylchedd ac amaethyddiaeth a chysylltiadau rhyngwladol.

Ar yr un diwrnod, addawodd y Prif Weinidog [Fil Rhyddid Brexit](#) i ‘gael gwared ar fiwrocratiaeth yr UE’. Nid yw'r amserlen ar gyfer y ddeddfwriaeth wedi'i chyhoeddi. Mae Llywodraeth y DU yn bwriadu defnyddio'r Bil i roi terfyn ar y statws a roddir i gyfraith yr UE a ddargedwir a'i gwneud yn haws i ddiwygio neu ddileu'r gyfraith hon.

4. Cysylltiadau rhynglywodraethol

Cyfarfu'r Pwyllgor Sefydlog Rhyngweinidogol am y tro cyntaf ym mis Mawrth, ar ôl [cwblhau'r Adolygiad o Gysylltiadau Rhynglywodraethol](#). Y [Prif Weinidog a'r Cwnsler Cyffredinol](#) oedd yn cynrychioli Llywodraeth Cymru.

Trafododd y Gweinidogion weithrediad yr Adolygiad o Gysylltiadau Rhynglywodraethol; ymagweddu at ddeddfwriaeth y DU a ffyrdd o weithio yn y dyfodol; y Papur Gwyn Ffyniant Bro; a goblygiadau'r rhyfel yn Wcráin i'r DU.

Mewn datganiad, dywedodd y Prif Weinidog ei fod wedi tynnu sylw at “achosion annerbyniol a chynyddol o dorri Confensiwn Sewel”, gan dynnu sylw at ohebiaeth gan y Pwyllgor Deddfwriaeth, Cyfiawnder a'r Cyfansoddiad ac argymhellion a wnaed gan Bwyllgor Cyfansoddiad Tŷ'r Arglwyddi ar ddiwygio'r confensiwn.

Hefyd, cynhaliodd y Pwyllgor Sefydlog Rhyngweinidogol Cyllid ei gyfarfod cyntaf cyn Datganiad Gwanwyn y Canghellor a chyhoeddodd ei gylch gorchwyl.

Cyfarfu cadeiryddion a chynrychiolwyr pwyllgorau seneddol o bob rhan o'r DU mewn Fforwm Rhyngseneddol newydd ar 25 Chwefror. Mewn datganiad ar y cyd, fe wnaethant gytuno i wneud y canlynol:

*ceisio gwella gwaith craffu drwy gyfnewid gwybodaeth ar y cyd
a thrwy geisio dull cyson o wella tryloywder ac atebolrwydd ar
lefel Gweinidogion a rhynglywodraethol yn ein priod
awdurdodaethau.*

Cynhaliwyd cyfarfod cyntaf Grŵp Rhyngweinidogol Cysylltiadau'r DU a'r UE ar 17 Chwefror. Dywedodd Gweinidog yr Economi wrth y Senedd nad oedd yn gallu bod yn bresennol oherwydd bod y cyfarfod wedi'i ail-drefnu ar fyr rybudd.

Cyhoeddodd Llywodraeth y DU ei hadroddiad blynyddol ar gysylltiadau rhynglywodraethol ar gyfer 2021, gan nodi gwybodaeth am gydweithredu rhwng y DU a'r llywodraethau datganoledig.

5. Deddf Marchnad Fewnol y DU

Gwrthododd y Llys Apêl yr achos a gyflwynwyd gan Lywodraeth Cymru yn herio'r Ddeddf.

Roedd Llywodraeth Cymru wedi dadlau bod Deddf Llywodraeth Cymru 2006 yn “statud cyfansoddiadol”, ac mai dim ond drwy wneud newidiadau pendant iddi y gall Senedd y DU ddiwygio statud o'r fath.

Roedd yn dadlau bod Deddf y Farchnad Fewnol yn lleihau pwerau'r sefydliadau datganoledig nid yn benodol ond drwy oblygiad, ac felly'n torri'r egwyddor hon.

Cadarnhaodd y Llys Apêl benderfyniad cynharach yr Uchel Lys fod yr achos wedi'i gyflwyno yn gynamserol, gan ddweud y gall y Llys wneud penderfyniad dim ond pan fydd Bil Senedd y dywedir y gallai'r Ddeddf leihau ei effaith bosibl. Mae Llywodraeth Cymru yn ceisio caniatâd i apelio at y Goruchaf Lys.

Ar 22 Mawrth, cyhoeddodd Swyddfa'r Farchnad Fewnol adroddiad cychwynnol ar gyflwr marchnad fewnol y DU.

Mewn trosolwg o'r newidiadau i reoleiddio ers diwedd y cyfnod pontio, ni chanfu'r OIM unrhyw dystiolaeth o ymwahanu sylweddol ar bolisi newydd rhwng gwahanol wledydd y DU ers diwedd y cyfnod pontio Brexit, ond casglodd enghreifftiau o feysydd lle gallai ymwahanu ddatblygu yn y dyfodol.

Cytunodd Llywodraeth y DU i greu eithriad o'r Ddeddf ar ddeddfwriaeth plastigau untro.

Mynegodd Llywodraeth Cymru a Llywodraeth yr Alban siom ynghylch natur gul yr eithriad. Ceir rhagor o wybodaeth yn yr erthygl hon gan Ymchwiliad y Senedd.

6. Fframweithiau cyffredin

Roedd 21 o'r 26 fframweithiau cyffredin arfaethedig yn ymwneud â Chymru erbyn diddymiad Cynulliad Gogledd Iwerddon ddiwedd mis Mawrth.

Mae pwyllgorau yn y pedair deddfwrfa wedi bod yn craffu ar y fframweithiau cyffredin dros dro. Yn y Senedd:

- Ysgrifennodd y Pwyllgor Iechyd a Gofal Cymdeithasol at Lywodraeth Cymru gydag argymhellion ynghylch fframweithiau cyffredin ar iechyd, a chwestiynau am y fframwaith cyffredin ar gyfer safonau cyfansoddiadol bwyd a labelu.
- Bu'r Pwyllgor Cyfrifon Cyhoeddus a Gweinyddiaeth Gyhoeddus yn gohebu â Llywodraeth Cymru ynghylch fframweithiau cyffredin ar gaffael cyhoeddus a thaliadau hwyr (trafodion masnachol).
- Fe wnaeth Pwyllgor yr Economi, Masnach a Materion Gwledig ymgyngori ar fframweithiau cyffredin o fewn ei gylch gwaith. Hefyd, trafododd y Pwyllgor y fframwaith rheoli a chefnogi pysgodfeydd fel rhan o'i waith craffu ar y Cyd-ddatganiad ar Bysgodfeydd.

- Bu'r Pwyllgor Newid Hinsawdd, yr Amgylchedd a Seilwaith yn gohebu â Llywodraeth Cymru ynghylch fframweithiau cyffredin ar sylweddau ymbelydrol ac ansawdd aer a chemegau a phlaladdwyr ar ôl cymryd tystiolaeth weinidogol ym mis Chwefror.

Fe wnaeth y Cwnsler Cyffredinol roi'r diweddaraf i'r Aelodau ar gynnydd y rhaglen fframweithiau cyffredin.

7. Deddfwriaeth

Deddfwriaeth y DU

Cafodd Senedd y DU ei haddoedi ddydd Iau 28 Ebrill. Bydd Araith y Frenhines yn digwydd ddydd Mawrth 10 Mai.

Cafodd pedwar o filiau'r DU, y mae'r Senedd wedi pleidleisio i atal ei chydysniad iddynt, Gydsyniad Brenhinol yn Senedd y DU ar 28 Ebrill. Dyma'r biliau:

- Bil yr Heddlu, Troseddu, Dedfrydu a'r Llysoedd;
- Y Bil Cymwysterau Proffesiynol;
- Y Bil Rheoli Cymorthdaliadau; a'r
- Bil Cenedligrwydd a Ffiniau.

Hefyd, cafodd y Bil Etholiadau Gydsyniad Brenhinol ar 28 Ebrill 2022.

Er bod Llywodraeth Cymru wedi argymhell yn flaenorol yn erbyn cydsyniad i'r Bil, newidiodd ei barn ar ôl i welliannau Llywodraeth y DU eithrio etholiadau datganoledig yng Nghymru o gwmpas llawer o'r darpariaethau a oedd yn y cynnig cydsyniad deddfwriaethol gwreiddiol.

Fodd bynnag, ceir anghytuno o hyd ynghylch darpariaethau argraffnod digidol, y mae Llywodraeth Cymru yn dadlau eu bod o fewn cymhwysedd y Senedd. Ceir anghytuno hefyd o hyd ynghylch cyflwyno gorchmynion anghymhwys, y mae Llywodraeth Cymru yn dadlau ei fod yn fater datganoledig oherwydd yr effaith ar gymhwyso ar gyfer aelodaeth o'r Senedd ac awdurdodau lleol yng Nghymru.

Rhodddwyd Cydsyniad Brenhinol i'r Bil Adolygiad Barnwrol a Llysoedd ar 28 Ebrill 2022.

Mae'r Ddeddf yn diddymu'r hyn a elwir adolygiad barnwrol *Cart*. Mae hyn yn cyfeirio at geisiadau a wneir i adolygu penderfyniadau'r Uwch Dribiwnlys i

wrthod caniatâd i apelio yn erbyn penderfyniadau'r Tribiwnlys Haen Gyntaf ar sail gwall cyfreithiol.

Mae'r Ddeddf hefyd yn darparu y caiff y llysoedd gyhoeddi gorchmynion gohiriedig a gorchmynion diddymu arfaethedig yn unig wrth ddirymu penderfyniadau cyrff cyhoeddus.

Cafodd y Bil Diddymu a Galw'r Senedd Gydsyniad Brenhinol ar 24 Mawrth 2022, gan ddod i rym ar yr un diwrnod.

Mae'r Ddeddf yn diddymu Deddf Seneddau Cyfnod Penodol 2011, ac yn adfer y pŵer uchelfrânt i alw etholiadau cyffredinol y DU i Lywodraeth y DU. Gwrthododd Tŷ'r Cyffredin un gwelliant gan yr Arglwydd yn ceisio gorfodi pleidlais yn Nhŷ'r Cyffredin ar gynnig diddymu.

Bydd nifer o filiau'r DU, gan gynnwys y Bil Diogelwch Ar-lein, yn cael eu cario drosodd i sesiwn newydd Senedd y DU.

Mae biliau eraill a allai effeithio ar Gymru, y disgwylir iddynt fod yn Araith y Frenhines, yn cynnwys:

- Bil Caffael i ddiwygio'r drefn gaffael gyhoeddus bresennol sy'n deillio o'r UE;
- deddfwriaeth ynghylch dileu statws arbennig cyfraith yr UE a ddargedwir yn neddfwriaeth y DU; a
- 'Bil Hawliau' y DU i ddisodli'r Ddeddf Hawliau Dynol.

Cydsyniad deddfwriaethol

Ers yr adroddiad monitro diwethaf ym mis Ionawr 2022, mae Llywodraeth Cymru wedi gosod 10 cynnig cydsyniad deddfwriaethol a memorandwm cydsyniad deddfwriaethol atodol pellach.

Mae'r Senedd bellach wedi pleidleisio i argymhell cydsyniad i sawl Bil lle'r oedd Llywodraeth Cymru wedi argymhell yn erbyn cydsyniad yn flaenorol, gan gynnwys y Bil Iechyd a Gofal Cymdeithasol, y Bil Rhent Masnachol (Coronafeirws), a'r Bil Etholiadau.

Covid-19

Daeth mwyafrif y darpariaethau dros dro a oedd yn Neddf Coronafeirws 2020 (nad oeddent eisoes wedi dod i ben yn gynnar) i ben ar 25 Mawrth 2022, fel rhan o'r cymal machlud dwy flynedd yn Adran 89 o'r Ddeddf.

Cyhoeddodd Pwyllgor Gweinyddiaeth Gyhoeddus a Materion Cyfansoddiadol Tŷ'r Cyffredin ei adroddiad: ['Coronavirus Act 2020: Two Years On'](#) ar 18 Mawrth.

Argymhellodd y Pwyllgor y dylai defnydd yn y dyfodol o gymalau machlud mewn deddfwriaeth debyg ddod ag esboniad clir ynghylch pam mae hyd y cymal yn gymesur â'r argyfwng y mae'n ymdrin ag ef. Fe wnaeth y Pwyllgor hefyd fynegi pryderon am ddiffyg gallu Senedd y DU i ddiwygio cymalau machlud ar ôl pasio'r Bil.

Cafodd mwyafrif y mesurau Covid-19 cyfreithiol oedd yn weddill yng Nghymru, gan gynnwys y gofyniad i wisgo gorchuddion wyneb mewn eiddo manwerthu ac ar drafnidiaeth gyhoeddus, [eu codi ar 28 Mawrth](#). Daeth y gofyniad i fusnesau gynnal asesiadau risg coronafeirws penodol i ben ar 18 Ebrill.

Cyhoeddodd Llywodraeth Cymru [gynllun hirdymor ar gyfer byw gyda Covid-19 ar 4 Mawrth](#).

Roedd y cynllun yn nodi cyfnod pontio hirdymor o bandemig i endemig, gyda'r Llywodraeth yn "symud tuag at dderbyn y coronafeirws fel clefyd y gellir ei atal drwy frechu, lle mai imiwneiddio yw'r llinell amddiffyn gyntaf fwyaf hanfodol".

Hefyd, cyhoeddodd Llywodraeth Cymru [gynodeb o'r ymateb deddfwriaethol gan Weinidogion Cymru i'r pandemig](#). Mae hyn yn cwmpasu'r holl bwerau brys yr oedd Gweinidogion Cymru yn eu harfer rhwng 1 Medi 2021 a 31 Mawrth 2022.

Cyhoeddodd Llywodraeth y DU ei [chylch gorchwyl drafft ar gyfer yr ymchwiliad cyhoeddus i'r pandemig COVID-19 ar 10 Mawrth](#).

Daeth yr ymgynghoriad ar y cylch gorchwyl drafft hwn i ben ar 7 Ebrill. Bydd yr ymchwiliad yn cael ei gadeirio gan gyn-farnwr Llys Apêl y DU, y Farwnes Hallett, a fydd yn gwneud argymhellion terfynol ar gyfer cylch gorchwyl llawn i'r Prif Weinidog ym mis Mai 2022. Nid oes disgwyl i wrandawiadau cyhoeddus ddechrau tan 2023.

8. Comisiwn y Cyfansoddiad

Cyfarfu'r Comisiwn Annibynnol ar Ddyfodol Cyfansoddiadol Cymru ar 16 Chwefror 2022.

[Lansiodd ymgynghoriad cyhoeddus ar 31 Mawrth](#), gan nodi "cyfle i ddweud [wrth y Comisiwn] beth sy'n gweithio'n dda ar hyn o bryd o ran sut mae Cymru yn cael ei llywodraethu, a beth sydd angen newid". Bydd yr ymgynghoriad yn para tan 31

Gorffennaf 2022, a disgwylir adroddiad interim yn yr hydref/gaeaf. Disgwylir adroddiad terfynol y Comisiwn erbyn diwedd 2023.

9. Diwygio'r Senedd

Cefnogodd cynrychiolwyr yng Nghynhadledd Llafur Cymru gynnig o blaid cynyddu maint y Senedd i rhwng 80 a 100 o aelodau.

Dywedodd y cynnig hefyd y dylai diwygio gynnwys dull o ethol sydd 'o leiaf mor gyfrannol â'r dull presennol', a chytunwyd y dylid sefydlu comisiwn ffiniau. Fe wnaeth Plaid Cymru hefyd gefnogi cynigion diwygio yn ei chynhadledd flynyddol, ond mae'r Ceidwadwyr Cymreig yn parhau i wrthwynebu.

Mae disgwyl i'r Pwyllgor Diben Arbennig ar Ddiwygio'r Senedd gyflwyno adroddiad erbyn 31 Mai 2022.

10. Cyfiawnder

Llywodraeth y DU

Cwblhaodd Llywodraeth y DU ei hymgyngoriad ar gynigion i ddisodli Deddf Hawliau Dynol 1998 â Bil Hawliau

Cafodd y cynigion eu beirniadu'n eang, gan gynnwys gan Cydbwyllgor Senedd y DU ar Hawliau Dynol a Llywodraeth Cymru.

Ar 3 Mai, cyhoeddodd y Cwnsler Cyffredinol gynlluniau i wneud gwaith paratoi ar opsiynau ar gyfer ymgorffori confensiynau'r Cenhedloedd Unedig yng nghyfraith Cymru.

Mae'r Weinyddiaeth Gyfiawnder yn ymgynghori ar ei hymateb i adolygiad annibynnol Syr Christopher Bellamy ar gymorth cyfreithiol troseddol.

Mae'r ymgyngoriad yn nodi cynigion ar gyfer newidiadau i gymorth cyfreithiol troseddol, gan gynnwys cynyddu cyfraddau cymorth cyfreithiol a newid strwythurau ffioedd.

Mae Cymdeithas y Cyfreithwyr wedi beirniadu yr ymgynghoriad am beidio â chyd-fynd ag argymhelliad Syr Christopher o gynnydd blynyddol mewn cyllid o 15 y cant o leiaf.

Cyhoeddodd y Weinyddiaeth Gyfiawnder grynodedb o ymatebion i'w hymgyngoriad ar ddatrys anghydfodau yng Nghymru a Lloegr.

Dywedodd yr adran y byddai'r ymatebion yn llywio gwaith ar ddefnyddio prosesau datrys anghydfodau i gynnig mynediad cyflymach, mwy effeithiol o ran cost a mwy cydsyniol at gyfiawnder, ac y byddai unrhyw gynigion polisi yn destun ymgynghoriad cyhoeddus pellach.

Llywodraeth Cymru

Cyhoeddodd Isbwyllgor Cabinet Llywodraeth Cymru ar Gyfiawnder gofnodion cyfarfodydd a gynhaliwyd ar 2 Chwefror a 29 Tachwedd.

Yn y cyfarfod ym mis Chwefror, cyflwynodd y Cwnsler Cyffredinol 'gyhoeddiad cynllun cyfiawnder' drafft. Ar 4 Mai, dywedodd y Cwnsler Cyffredinol wrth y Senedd fod disgwyl y cyhoeddiad "o fewn ychydig wythnosau".

Bu'r Is-bwyllgor hefyd yn trafod amrywiaeth o faterion eraill, gan gynnwys cyfarfodydd â Gweinidogion y DU; ymddeoliad yr Arglwydd Lloyd Jones o'r Goruchaf Lys; cyllid ar gyfer safleoedd tystiolaeth o bell i ddiodefwyr cam-drin domestig gael cymryd rhan mewn llysoedd ynadon; lleihau aildroseddu; a gwaith swyddogol i fapio gofynion ar gyfer data cyfiawnder wedi'u dadgyfuno.

Ym mis Tachwedd, cynhaliodd yr Is-bwyllgor drafodaeth gyda Chomisiynwyr yr Heddlu a Throsedd, a chlywodd ddiweddariad gan swyddogion ar gynlluniau i fabwysiadu dull 'glasbrint' ar y cyd rhwng cyrff datganoledig a chyrrff heb eu datganoli i fynd i'r afael â thrais yn erbyn menywod, cam-drin domestig a thrais rhywiol.

Cyhoeddodd Llywodraeth Cymru ei hadroddiad blynyddol ar weithredu cynigion Comisiwn y Gyfraith.

Mae'r adroddiad yn nodi cynnydd tuag at weithredu argymhellion Comisiwn y Gyfraith, gan gynnwys ynghylch cynllunio, etholiadau, tacsis a cherbydau hurio preifat, bywyd gwyllt, a Thribiwnlysoedd Cymru.

Ar 3 Mai, cyhoeddodd Llywodraeth Cymru, Cymdeithas y Cyfreithwyr a CILEX lwybr prentisiaethau cyfreithiol newydd, sy'n agored i'r rhai dros 16 oed gyda nawdd gan gyflogwyr.

Bydd prentisiaid yn cwblhau cyfnod Sylfaen (Lefel 3) a chyfnod Uwch (Lefel 5) y Cymhwyster Proffesiynol CILEX, cymhwyster galluogi fel uwch-swyddog paragyfreithiol CILEX neu gyfreithiwr CILEX dan hyfforddiant.














Y Goruchaf Lys

Ymddeolodd yr Arglwydd Lloyd-Jones o'r Goruchaf Lys ym mis Ionawr, ar ôl cyrraedd 70 oed. Ers hynny mae Deddf Pensiynau'r Gwasanaeth Cyhoeddus a Swyddi Barnwrol wedi cynyddu'r oedran ymddeol barnwrol gorfodol i 75.

Yr Arglwydd Lloyd-Jones oedd yr Ustus Goruchaf Lys cyntaf o Gymru ac mae bellach wedi ymuno â phanel atodol y Llys.

O dan Ddeddf Diwygio Cyfansoddiadol 2005, mae'n rhaid i'r Llys gael aelodau sydd â gwybodaeth a phrofiad o ymarfer yng nghyfraith pob rhan o'r Deyrnas Unedig. Ceisiwyd ceisiadau ar gyfer Ustusiaid newydd yn y gwanwyn.

Fframwaith ar ôl Brexit: termau allweddol

Rhwymedigaethau rhyngwladol		Dyletswyddau ac ymrwymïadau rhyngwladol y DU
Cytundebau masnach		Sefydlu trefniadau masnachu newydd rhwng y DU a gwledydd eraill
Cytundebau rhyngwladol		Cytundebau rhwng y DU a gwledydd neu sefydliadau eraill
Cytundeb Masnach a Chydweithredu y DU a'r UE		Sefydlu'r berthynas newydd rhwng y DU a'r UE
Cytundeb Ymadael y DU a'r UE		Gosod telerau ymadawiad y DU o'r UE
Protocol Iwerddon a Gogledd Iwerddon		Rhan o'r Cytundeb Ymadael i osgoi ffin galed ar ynys Iwerddon
Deddf yr UE (Ymadael) 2018		Trosi cyfraith yr UE yn gyfraith ddomestig, yn atal deddfau newydd yr UE rhag cael effaith awtomatig yn y DU ac yn rhoi pwerau i Weinidogion gywiro'r llyfr statud ar ôl ymadael â'r UE
Deddf yr UE (Cytundeb Ymadael) 2020		Gweithredu'r Cytundeb Ymadael
Deddf yr UE (y berthynas yn y dyfodol) 2020		Gweithredu'r Cytundeb Masnach a Chydweithredu
Deddf Marchnad Fewnol 2020		Sefydlu rheolau newydd ar gyfer rheoleiddio nwyddau, gwasanaethau a chymwysterau ledled y DU
Fframweithiau Cyffredin		Sefydlu fframweithiau ledled y DU ar gyfer rhai meysydd a lywodraethwyd yn flaenorol gan yr UE
Gweithredu rheoliadau		Pasio rheoliadau yn y Senedd neu Senedd y DU i weithredu'r trefniadau newydd
Cywiro rheoliadau		Pasio rheoliadau yn y Senedd neu Senedd y DU i sicrhau bod deddfau'r UE a ddargedwir ar ôl ymadael â'r UE yn ymarferol mewn cyd-destun domestig

